



Inatsisartuni ilaasortaq, Gerth Mikaelson, Naleraq
Maani/

§ 37 naapertorlugu apeqquteqaammut 167_2025-mut tunngasumut akissut

Inatsisartut suleriaasissaanni § 37-mi imm. 1 naapertorlugu apeqqutini Naalakkersuisunut nassiusaqarsimavutit, Ittoqqortoormiit aamma Kangerlussuup eqqaanni qilalukkat qernertat satellitsikkut attaveqaatilinnik ikkussuivigineqarnerat pillugu. Apeqqutitit uanga suliaasaqarfisannut akisassanngortinneqarsimapput.

Aallarniutigalugu nalunaarutigissavara Naalakkersuisoqarfik Pinngortitaleriffimmit apeqqutitut akissutissanut ilanngussassanik pissarsisimammat, taakkulu akissutini ilanngunneqarput.

Apeqqut 1: Ittoqqortoormiini kiisalu Kangerlussuarmi qilalugaqarfiusuni qilalukkanik satellit senderilersuisoqarnikuuvoq. Taakkua pillugit Naalakkersuisut innuttaasunut paasissutissanik tutsuiginartunik paasititsiniaaniarpat?

1-imut akissut: Naalakkersuisut sinnerlugit ilisimatitsissutigisinnaavara Pinngortitaleriffik qilalukkanik qernertanik satellitsikkut attaveqaatilinnik ikkussuisimammat ukiuni 2010-miit 2019-imut. 2020-mi misilinnegaraluarpoq iluatsitsiffiunngitsumik, qilalukkanik qernertanik nalunaaqutsertsugassanik soqanngimmat ikkussuinissaq taamaatiinnarneqarpoq. Ittoqqortoormiini satellitsikkut nassitsissutit katillugit 67-it ikkunneqarsimapput ataaserlu Kangerlussuarmi ikkunneqarsimalluni. Nassitsissutit ullumikkut nassitsisarunnaareerput.

Pinngortitaleriffik nalunaaruteqarpoq arlalitsigut iliuuseqarsimallutik ilisimatusarneq innuttaasunut paasititsiniutigalugu, maannangaarlu pilersaaruteqarnani Tunumi qilalukkanut qernertanut tunngasunik paasititsiniaanissaminut. Apeqquteqaammut 2-mut akissut takuuk.

Apeqqut 2: Innuttaasunut paasititsiniaaneq taakkua qilalukkat sumiittarneri pillugit innuttaasunut paasititsiniaanikuuppat?

2-mut akissut: Ilisimatitsissutigisinnaavara Pinngortitaleriffiup piniartut nalunaaqutsertsuinernut peqataasut tamaasa qarasaasiakkut malinnaasinnaangorlugit periarfissinnikuummagit. Malinnaanikkut paasisat nutaat pissarsiarineqarsimapput, qilalukkat qernertat piffissap qanoq ilinerani sumiittarnersut aammalu qernertat ingerlaartarfii sumiinnersut. Satellitsikkut nalunaaqutsertsuinernit paasissutissat piniartunit soqutigineqaqaat.

Apeqqut 2a: Imaluunniit Naalakkersuisut uumassusilerisunut paasitsinneqarnikuuppat sumut ingerlaarsimanersut?

2a-mut akissut: Ilisimatitsissutigisinnaavara qilalukkat qernertat pillugit Tunumi misissuiffigineqarnerisa inernerit tamarmik NAMMCO-mut saqqummiunneqarmata, tassanilu Naalakkersuisut ilaapput. Pinngortitaleriffik aamma arlaleriarluni oqaaseqaatinik Naalakkersuisunut nassiusaqartarsimavoq, apeqqutillu assigiinngitsut qilalukkanut

09-10-2025
Suliap normua: 2025 - 20190
Akt normu: 25812643

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apn@nanoq.gl
www.naalakkersuisut.gl

qernertanut tunngasut akissuteqarfigisarsimallugit. Pinngortitaleriffiup Naalakkersuisullu akornanni attaveqatigiittarneq ataatsimeeqatigiilluni pisarput.

Siunersiuinermut aggersaanerit, ilisimatitsinissamut ataatsimiinnerit aamma ataatsimiititaliamiit apeqqutinut atatillugu Naalakkersuisoqarfiup Pinngortitaleriffimmiit nalunaarusiat tiguneqartut pillugit ataatsimiititaliaq ilisimatittarpaa.

Apeqqu 2b: Paasissutissat sumut aasinnaavakka taakkoqqissaat qilalukkat pillugit?

2b-mut akissut: Ilisimatitsissutigisinnaavara Pinngortitaleriffiup qilalukkat qernertat sumiittarnerinut nunap assingani takuneqarsinnaasut saqqummiunnikuugiai, qilalukkat qernertat pillugit atuakkami kapitali 8-mi takuneqarsinnaasumi: https://natur.gl/wp-content/uploads/2023/03/Hvidbog_narhval_del-2_ny.pdf

Taamatuttaarlu ilisimatitsissutigisinnaavara qilalukkat qernertat pillugit atuakkiaq 2023-mi saqqummersinneqartoq. Qallunaatuinnaq allataavoq kalaallisut eqikkarneqarluni. Qarasaasiakkut aaneqarsinnaavoq, aammali atuakkap assilinera akeqanngitsumik Pinngortitaleriffimmut piniarneqarsinnaavoq. 2023-mi apriliimi maajimilu atuagaq ukununga agguanneqarsimavoq:

- Naalakkersuisut (30-it)
- Inatsisartut (50-it)
- KNAPK (100-it)
- Nunatta Atuagaateqarfia (10-it)
- Nunatsinni gymnasiat tamarmik (40-it).

Qilalukkat qernertat Tunumi misissuiffiqineqarsimanerat Pinngortitaleriffiup nittartagaani aamma allaaserineqarsimavoq: <https://natur.gl/year-kl/2016-kl/tunumi-qilalukkanik-qernertanik-misissuinerit/?lang=kl>

Qilalukkat qernertat Tunumi nalunaaqutsersorneqarsimanerat aamma qilalukkanik qernertanik ilisimatusarnermut tunngasut Pinngortitaleriffiup tusarnaagassialiaanni tusaaneqarsinnaapput uani: <https://natur.gl/kommunikation/podcast/>

Qilalukkat qernertat Tunumi misissuiffiqineqarnerat pillugu videot arlallit aamma Greenland Science Week-imut atatillugu 2021-mi aamma suliarineqarsimapput: <https://natur.gl/videot-2/?lang=kl>

Qilalukkat qernertat pillugit KNR raatiukkut apersuinerit aamma ingerlanneqartarsimapput.

Pinngortitaleriffiup ilisimatitsissutigaa annerusumik paasititsiniaanerit suliarineqassappata amerlanernik aningaasaliissutinik pisariaqartitsisoqassasoq.

Inussiarnersumik inuulluaqqusillunga



Peter Borg

Aalisarnermut, Piniarnermut, Nunalerinermut Imminullu Pilersornermut Naalakkersuisoq